

«Անձնաչափ կենարարին Քրիստոսի լայնութիւն տապանափորած վիմին գիրկ ու կէս հեռի, են ի միջի գմբէթին սրբոյ կենարար Գերեզմանէն, եւ ի վերայ եկեղեցւոյն, որ շինեալ է 100 կանգուն բարձրութիւնն և 100 լայնութիւնն՝ բոլոր յայս և յայն կողմն երկոտասան սիւնք ներքոյ, և երկոտասան ի վերայ վերնատանն, և յայն վերնատանն զեղարդն և սկաւառակն պատեալ ոսկով. իսկ եկեղեցին կաթողիկէ, որ մատուռն անուանի, որ է Գիւտ Սաչի՝ 20 կանգուն հեռագոյն ի Յարութենէն, 65 սիւն վեր եւ ի ներքոյ երկայնութեան: Իսկ սուրբ Գողգոթայի եկեղեցին 10 քայլ հեռու է ի Յարութենէն, որ Ագամայ գերեզման կոչի, և ի վերայ՝ սեղան խորհրդոյ, յորում խաչեցաւ Քրիստոս ի վիմին վերայ: Իսկ սուրբ Սիօն եկեղեցին միով ասպարիգաւ բացագոյն է ի Յարութենէն 100 կանգուն ի յերկայնն և 70 ի լայնն, 80 սեամբք կամարակապօք, և չէ վերնատնօք, այլ թարբ կապեալ է փայտեայ, եւ պսակ փշոյն կայ ի կախ զթարբէն, որ եղին կենարարին ի գլուխ: Եւ յաջմէ եկեղեցւոյն վերնատունն խորհրդոյ և փայտեայ գմբէթ, յորում նկարեալ է զընթրեացն խորհուրդ փրկչին, յորում է սեղան խորհրդոյ եւ պատարագ մատչի ի վերնայարկին Սիօնի, և վերնատուն մի լինի (կամ վերնատունն նիջին, այլ օրինակէ):

Եւ սուրբ Սիօնի ընդ աջմէ խորանն Պիղատոսի, որ Կապաթա անուանի, և վէմն յորոյ ի վերայ կայր Փրկիչն առաջի Պիղատոսի, յոր ոտից տեղն երևի ցարդ ևս, և աւազանն ներքոյ նորին, ուր զաշակերտացն լուաց զոտան, և յահեկէ Սիօնի բանտն, ուր զՔրիստոս արգելին, անդ սեղան է եւ պատարագ մատչի: Եւ յայնմ տեղուջ ուր զսուրբ Կուսին դագաղան կա-